

MEJE PO CARTE PABLO TATINA, COLOSAS TOMARAPIWI TATINATSI

**Meje yabara poxonaē Pablo tamropata pitaba xua
tatina pomonaē Colosas tomarapiwi tatinatsi**

1 ¹Xan, Pablon, iru Timoteono, pon be painya neyapin jiton patsicotaneme xua xanno iru pon be tayapin tsicotan. Baponbe, panbe, paca jacobatsi. Xan, Pablon, Cristo Jesús pia peitorobiwi tatsi jiwanan xua Nacom peichichipaewaxae. ²Barapo carte pacata tinatsi pomonaē painya neenaewi Colosas tomaratha, pomonaē Cristo pajume cowuntame, iru pomonaeno yatsicaewa xanepanaya Cristo peitabaratha painya nejinompaewino. Barabu Nacom pon Waxa, paca yawenaena pia paca necaantobexae, yawano jantema jinompa paca exanaena.

**Meje yabara poxonaē Pablo Nacomtha tawuca
pomonaē Jesús pejume cowuntsiwi**

³Poxonaē Timoteo panbe pacata wuqueibatsi Nacomtha, pon Jesucristo Paxa tatsi, pon Wanacanamataxeinaein, pajan tsaibinbe: “Nacom maisa pajuntu coyene weiweinanbe xua barapomonaē necajume cowuntsixae”, pajan tsaibinbe. ⁴Baxua papaebeibanbe tsipei bayatha Timoteo panbe Epafras pana netsipaeba. Epafras namchi: “Colosas tomaramonaē Cristo Jesús jume cowunta, —jei— yawa antobe ichamonaeno pomonaē pejume cowuntsiwi Jesucristo”, jei Epafras. ⁵Paantobem ichamonaē, pomonaē pejume cowuntsiwi Jesús, yawa xua pajume cowunta dubenanaebiyame. Baxua paexaname tsipei payaputaneme xua bexa tsane Nacom paca catsina xua pia nacuatheicha xeina, xua peantuypuswa po peantuypuswa jopa weraweracaeyo. Caena bayatha yabara paca tsiwunaeya muxu duta poxonaē Nacom Pejume Diwesi pajume taneme. Baxua anoxuae cataunxuae paewatame. ⁶Po diwesi xua pajume taneme

Nacom pia pecapanenebiyae diwesi, barapo diwesi pejume xainyeiwa. Matautano barapo diwesi jiwi foforotapoinchi xua jume cocowuntapona, daxita carepaya tomarantha barapo cae pin nacuathe. Icha paxam paichim bayatha, barapo diwesi paca foforotapona xua pajume cocowuntapona poxonae aena pajume taneme barapo diwesi. Barichi payaputanemeno xua Nacom paca necaantobewa xua awiya cataunxuae paexanapona. ⁷Barapo Nacom pia pecapanenebiyae diwesi xaniwaicha caena bayatha Epafra paca tsipaeba. Bapon Epafra paantobein. Bapon Epafra xaniwaicha Cristo yabara cueicueijeichi. Bapon baxua painta exanapona xua pana yawenapona xua Timoteo panbe pata ecaexaeb jiwi pecubi botha. ⁸Epafra xote patopa. Bapon Epafra Timoteobe, pana netsipaebabe xua pinae paxam paantobem daxita pomonae Jesús pejume cowuntsiwi Nacom pia Pejumo pe tñaxu tatsi painya nepaca yawenaexae.

⁹Bara caena poxonae aena, poxonae pajume tanbe xua pinae Jesucristo pajume cowuntame, pomonae Colosas tomarapiwi pam, Nacomtha pacata wñqueibatsi. Jopa seica paexaneibinyobe xua pacata wñqueibatsi Nacomtha, pajan tsaibinbe: “Nacom, yawende Colosas tomarapiwi yabara neyaputae exanaenexa xua peexanaewa tsane pocotsiwa ichichipame. Yawa care barapomonae daxita peyaputae coyenewan po coyenewan nejumo pe tñaxu cata jiwitha”, pajan tsaibinbe Nacomtha. ¹⁰Icha paxam payaputaneme po coyene xua pocotsiwa Nacom ichichipa pon jiwi Pecanamataxeinaein xua pocotsiwa painya neexanaewa, bapoxonae beta pajjinaponaename Nacom pia paca necayawenaenexa. Bara be Nacom pia pexui pana natsicotaneme tsipei baxua Nacom unthuthu jopa xua unthuthu weiweina. Jiwi pafoforotapona xua Jesucristo jume cocowuntapoinchi. Daxota baxua Nacom unthuthu jopa xua unthuthu weiweina. Paca anthuthuyapusu exana. Matautano yabara paca yaputane exana xua painya neexanaewa tsane pocotsiwa Nacom ichichipa. ¹¹Timoteo iru xanno Nacomtha patsipaebibanbe xua Nacom pia paca catsinexa tsane pia peitupanaewa xua peayapusuwa, icha Nacom ichi xua xeina barapo peitupanaewa xua peayapusuwa. Barapo peayapusuwa paca yawena xua pajumefebame xua poxonae ichamona paca itoroba xua abe painya neexanaewa. Yawa paca yawena xua juntu coyene weiweinaya paexaname xua jopa paaitaconaem, xua poxonae bequein ichamona abe pacata exana. ¹²Poxonae Nacom patsipaebame, juntu coyene weiweinaya pajacobare tsipei bapon Nacom paca yabara junte maina abe painya neexanae cuiru coyenein. Bapoxonae Nacom tsita xanapanatsi painya juntu coyenein barompaya painyawan painya nexainaenexa pocotsiwa Nacom paca juntana jeba pia nacuatheicha xua painya nejume cowuntsixae bapon. Paca catsibina poxonae paxam bara xoteicha papatsiname. ¹³Waxa, Nacom, wanaca capanepaexae

Satanás pia peayapusu itorobi coyene weya tatsi, daxota anoxuae cauri pia pentacaponaein tatsi jopa equeicha cana exanaetsi xua wanaca canamataxeinaewa tsane. Apará jame Nacom yatsicaewa naca cana exana xua bapon piamonae tatsi naexainchi pomonaexaetsi xua Pexanto tatsi pon Jesús itorobiya naca ewata, po Pexantoxae bichocono antobe. ¹⁴Nacom Pexanto tatsi naca capanepa, naetotha wanaca tsitupaexae. Daxota daxita abe waexanae cuiru coyenein Nacom naca cayabara junteina.

**Meje yabara xua waxainchi pomonaetsi junteina
jinompatsi Cristo wanaca tsitupaexae naetotha**

¹⁵Nacom bapon peinya pepoponaein, pon jopa pataeinyo. Ichitha Jesucristo bapon paxa yatsi itapeinya xeina, pon yatsicaewa patan. Caena bayatha poxonae aena bapon Jesucristo popona xua pewunaeya poxonae Nacom daxita forota barapo cae pin nacuathe. ¹⁶Nacom daxita forota barapo cae pin nacuathe poxonae Jesucristo saya paxa taexana. Yawa daxita forota itabocotha. Matautano forotano xua jopa penatsita itapeinya xeinaewa, xuano xua penatsita itapeinya xeinaewa. Nacom exana daxita peitorobi coyenewan xua pomonae pentacaponaei nexa. Ichamonae jiwi itoroba nawita, ichamonae be conotha itoroba jiwi, daichitha daxita barapo coyenein Nacom exana xua barapo peitorobi coyenein. Jesucristo penacui yaputaexae xua ichichipa daxota daxita forota yawa bapon nata exana. ¹⁷Caena bayatha bapon Cristo ataya popona poxonae cataunxuae jopa bapon foforotaponaeyo daxita. Cristo canamataxeina daxita daxota nacua xanepanaya wunaeya ducua. ¹⁸Daxita pomonae Cristo jume cowunta be caein naexana. Bapon Cristo barapomonae pia Pecanamataxeinaeinchi tatsi. Baxua caunuta xua Cristo canamataxeina barapomonaetha pomonae pia pejume cowantsiwixaetsi. Bapon Cristo antajumopeyapusu exana pomonae pejume cowantsiwichi. Bapon Jesucristo copiya asu nanta canaexanatsi petupaewatha. Daxota bapon canamata exanatsi xua canamataxeina daxita coyenein. ¹⁹Nacom, Waxa, unthuthu weiweina bichocono poxonae Pexanto cui tane xua cui jupatsi Pexanto tsipei daxita xeina icha bapon ichi xua daxita xeina. ²⁰Daxita pomonae jinompa po cae pin nacuathe ita coxanatsi Nacomtha. Iruru pomonae jinompa athabeicha ita coxanatsi Nacomtha. Daxota Nacom Pexanto itoroba xua petsitupaenexa naetotha pomonae po cae pin nacuathepiwi, iruru pomonae athabeicha jinompa nexa, xua bapoxonae Nacom peita coxonaewa tsainchi yawa petsita najuntu coyene xanepana exanaewa tsainchi.

²¹Paxam copiya Nacom jopa paita coxonaem, be pomonae penanapaincha jinompaewi patsita naexaname Nacomtha. Yawa Nacom pia peaitafaetabi jiwichi pam, abe painya neexanae dubenanaebiyaexae

painya jũntũ coyenewatha. ²²Ichitha nama anoxuae payaputaneme xua Cristo bayatha tũpa naetotha xua poxonae bara jiton cuiru coyeneya. Daxota anoxuae Cristo paca cana exana xua Nacom paita coxoname pomonae pam pomonae copiya Nacom pia peaitafaetabi jiwichi pam. Poxonae Cristo tũpa pia paca exanaenexa pomonae pam pomonae Nacom peitũtha tatsi penthũthũ cui xanepanae jiwi pam. Mataũta paca cana exana xua ichamonae painya jopa nepaca yabara paebiwa xua abe painya neexanaewa. ²³Cristo paca exana xua xanepanaya painya nejinompaewa tsane Nacom peitabaratha. Baxua paca cana exana icha beta pajume cowũnta dubenanaebiyaename Nacom pia pexeinya pecapanenebiyae diwesi jume. Yawa jopa papentsinde xua paewatame xua pinae Nacom paca catsibapaeba, xua bayatha pajume taneme. Nacom paca catsina pocotsiwa pia nacua beicha xeina xua peantũyapũsũwa xua jopa weraweracaeyo xua caena bayatha yabara paca tsiwũnae muxu duta Nacom. Barapo pexeinya pecapanenebiyae diwesi bayatha Jesucristo pia pejume cowũntsiwi tatsi cueicueijei xua daxita nacuan yajũpaya. Irũ xan, Pablon, paebaponandũ barapo diwesi.

Meje yabara poxonae Pablo Nacom Pejume Diwesi tsipaeba pomonaetha pomonae Jesucristo pejume cowũntsiwichi

²⁴Xan, Pablon, anoxuae jũntema weiweinaya poponan bequein neperaxa exana paxam nexa. Icha Cristo ichi poxonae peraxa exanatsi jiwi nexa, barichin xan neperaxa eexanaponaena paxam nexa pomonae Cristo pijimonae pamxaem. Atenein beya poxonae wetsin pocotsi coyene cuiru Cristo bewa ajũntũcoyenetane tsoponae tsane pomonae pia pejume cowũntsiwichinexa. Bapoxonae Cristo pia coutha paebina xua xan equeicha jopa atenein tsane. ²⁵Xan, Pablon, Nacom Pejume Diwesi tacueicueijei jiton tana neitorobixae Nacom tapaca cayawenaenexatsi xua irũ daxita carepaya jiwi pejume taetaeponaewa tsane barapo Nacom Pejume Diwesi. ²⁶Barapo diwesi caena bayatha Nacom moya yawũn xeina xua jiwi jopa yabara yaputaeyo. Ichitha anoxuae barapo diwesi matapainya Nacom yabara yaputane exana pomonaetha pomonae pejume cowũntsi jiwixaetsi. ²⁷Barapo pexeinya jume diwesi Nacom caena bayatha moya yawũn xeina xua jiwi jopa yabara yaputaeyo, ichitha anoxuae ichichipa irũ yabara yaputane exana barapo pexeinya jume diwesi pomonaetha pomonae jopa judiomonae naexanaeyo. Barapo Nacom moya peyawũn xeinaewa xua apara Cristo paca yanaba. Daxota paewatame xua bexa Cristo paca catsina, xua caena bayatha yabara paca tsiwũnae muxu duta Nacom.

²⁸Daxota pacueicueijan barapo diwesi po diwesi xua Cristo yabara. Daxita jiwi pamuxu jan. Daxita jiwi pacuiduban Nacom pia peyaputae coyenetha tatsi, tsipei paichichipan xua Nacomtha xaniwaicha yajũntũ

coyene xanepanaya patsina xua be caemonae penaexanaewa tsane Cristotha. ²⁹Daxota daunweya nacuitan Cristo tana necatsixae pia peayapusŭwa xua bichocono ayapusŭ tacueicueijeinexa tsane Nacom Pejume Diwesi poxonae barapomonae tsipaeban. Barapo peayapusŭwa jiwı tsita itutan poxonae daunweya nacuitan.

2 ¹Baxua paca tsipaebatsi pomonae painya nejume cowũntsiwa Jesucristo tsipei ichichipan xua painya neyaputaewa xua bichocono tapaca antobewatsi. Daxota bichocono pacata wŭwŭcaponeibatsi Nacomtha. Irũno pomonae Jesucristo jume cowũnta, pomonae jinompa Laodicea tomaratha, barapomonae irũ tawũcan. Irũrũ daxita ichamonae pomonae jopa netaeyo, tawũcan. ²Antŭyapusŭya Nacomtha pacata wũcatsi, xua painya nepaca cajũntũ coyene tsacarabi exanaenexa xua jũntema painya nejinompaenexa xua caemonae nantiya painya nenaantobenexa. Mataũtano pacata wũcatsi xua painya neyaputaenexa xua daxita peyaputae coyene xua daxota painya neyaputaewa tsane po coyene xua copiya Nacom moya yawũn xeina po coyene xua Cristo yabara. ³Cristo pon peyaputaein, pon daxita coyenein yaputane. Icha caein jiwana paxam, icha bapon ichichipa xua pexeinaewa barapo peyaputae coyene, bũ jame wũca. ⁴Baxua paca muxu jeichi, tsipei jopa ichipaeinyo xua ichamonae paca cui caranababa xua naerabiya paca muxujainyaba po jumeintha xua naemata beta paeba. ⁵Paca yabara cananta xeineibatsi, be natsicotan xua be paca barũ popoinchi bequein tajũ ecan. Jũntũ coyene weiweinan xanepanaya jume cowũntsiya painya nejinompaexae Cristo, yawa jũntũ coyene weiweinanno xua painya nenacui xainwaetsiya jinompaexae Cristotha.

Meje yabara xua jiwı pena jũntũ coyene xeina Cristotha

⁶Mexeya poxoru painya neyabara jume cowũntsixae xua pinae Jesucristo pon painya Nepacacanamataxeinaein, daxota bewa bara paraichim bewa caemonae pana naexanaem Cristotha xua xaniwaicha painya nejinompaenexa bapontha. ⁷Paitacoxonaya yaputaeponde Cristo painya pewũnaein jiton. Matowa yabara pana nacuidudubaponde Cristo pocotsiwa bayatha exana. Matowa paexande xua pocotsiwa bapon paca itoroba. Mataropeicha payaputaeponde xua pexainyeiwa jume, icha matha ichi xua ichũn paca cuiduba poxonae pajume cowũntame Jesucristo. Yawa matowa pajande: “Nacom, maisa pajũntũ coyene weiweinan xua painta exaname”, pajan tsaibinde.

⁸Dota pam tsipei jopa ichipaeinyo xua ichamonae paca cui caranababa xua naerabiya paca muxujainyaba xua painya neexanaewa tsane xua naemata beta paeba. Pomonae xua paca cuiduba pia peitorobi coyenein, baraxua apara jopa Cristo pia peitorobi coyenewa tatsi. Apra saya pon pepawi, bapon pia peitorobi coyenein tatsi, apra saya nacia pia peitorobi coyenein tatsi.

⁹Nacom Pexanto cana nayawa exana xua Cristo xeina daxita i dapo coyenein, po coyenein Nacom xeina. Barapo coyenein bapon Cristo xeina pon pepa pebin naexana Nacom Pexanto tatsi. ¹⁰Apara Cristo piamonae tatsi pam. Cristo, bapon compa yatsicaya Pecanamataxeinaein cana exanatsi xua daxita canamataxeinatsi pomonae itabocotha peitorobiwi pia peayapusuwatha. Poxonae Cristo panantautame, jopa ichauyo pacata seicaeyo xua paxeiname xua pocotsiwa Cristo juntema popona paca exana. ¹¹Paxam anoxuae icha juntu coyene paxeiname Cristo painya nejume cowuntsixaemxae, yawano poxoru painya nenantu cui barapentsixaemxae xua abe paexaname. Icha judiomonae ichi xua nawi thaba ichaxota pebiwi nareixacaena bapana baxua jopa paca juntu coyene capanepae abe painya neexanae cuiru coyenein weya. Jame xua Jesucristo naetotha tupa, baxua jame paca unthuthu coyene capanepa abe painya neexanae cuiru coyenein weya. ¹²Poxonae ichun paca bautisaba, be paca muthutha penta, icha Cristo ichichi poxonae muthutha xotsi. Bara paca juta ichi. Yawa poxonae xua pamatawunname be equeicha asu pajinompame, icha Cristo ichichi poxonae Nacom asu exana Pexanto poxonae equeicha itowan popona. Bara paca juta ichi painya nejume cowuntsixae Nacom. ¹³Caena bayatha paxam jopa paichichipaem xua painya neexanaewa pocotsiwa Nacom paca itoroba poxoru saya abe painya neexanae jiwi pam. Daxota Nacom be pomonae pewerapae jiwi patsita jinompame. Saya u abe peexanae cuiru coyenein painya nenanta xeina dubenanaebiyaexaemxae, poxoru saya abe painya neexanaewi. Baxua paexaname poxoru barapo peabewa paca itata cadopiteiba xua abe painya neexanaewa tsaiibi tsane. Jopa Nacom pajeichim poxoru paxam barapocotsimonae pam, pomonae jopa judiomonae naexanaeyo pam po judiomonae nawi thaba ichaxota pebiwi nareixacaena, Nacom paca exana xua anthuthucoyenesuya painya nejinompaewa xua Cristo painya neyawa jinompaewa. Bapon Nacom nacata juntemaina xua daxita abe waexanae cuiru coyenein. ¹⁴Nacom jopa naca yabara paebiyo xua abe exainchi poxonae bara bequein jopa exanaetsi po peitorobi coyenein judiomonae exana xuano xua naca cui itoroba xua po peitorobi coyenein bequein Nacom itoroba. Daxota Nacom jopa naca yabara paebiyo xua abe exainchi tsipei Cristo naetotha cobe matatabarutatsi xua pentoma nacata exana xua wanaca capanenebiya exanaenexa abe waexanae cuiru coyenein weya. ¹⁵Poxonae Cristo naetotha tupa, Cristo pecui pawu cana exana po pentacaponawewi xua abe peexanaewi xua barapomonae peamanayabixaetsi. Daxota barapomonae jopa xeinaeyo peitorobi coyene xua peayapusu coyene. Pin bicheito itabaratha Cristo aura exana pentacaponawewi. Anoxuae Cristo pentacaponaein exanatsi xua daxita barapo jiwi pecanamataxeinaenexatsi.

Meje yabara xua jei: “Itapeta payabara nanta xeinare xua pocotsiwa Nacom juntana jeba jiwi, pia nacuatheicha”, jei

¹⁶Daxota dapon ajibi pon itacupatsi xua painya nepaca yabara paebiwa xua abe painya neexanaewa xua pocotsiwa painya nexaexae, xuano

xua pocotsiwa painya neapaexae. Matautano bapon jopa itacupaetsi xua painya nepaca yabara paebiwa xua abe painya neexanaewa po matabitha poxonae jiwi tsinacaetuta pin pexaewa xua penabanaewa tsane, matautano xua paexaname po mataqueitha poxonae jomocoichato aena equeica, matautano po matabintha poxonae pentaquei seicae matabin poxonae jiwi jopa nacuichiyo. ¹⁷Caena bayatha barapo peitorobi coyenein judiomonae cuidubatsi Nacom, xua saya u pejume. Barapo jumeintha judiomonae cuidubatsi Nacom, xua yabara yaputane peexanaenexa tsainchi pocotsiwa bexa Cristo exanaena. Apra bayatha Cristo patopeica. Icha paxam paichichipame xua painya nenaexanaewa tsane Nacom piamonae tatsi bewa paexanaem pocotsiwa Cristo paca itoroba. ¹⁸Jopa pacopatsinde xua ichamonae paca yabara paeba xua pana natsiaenae cuentame xua jopa painya neexanaexae icha barapomonae ichi. Barapomonae paca aeba poxoru tane petsita itubi coyenewan po coyenewan xua ichamonae jopa taeyo. Barapomonae paca itoroba xua pepawi jiwi painya nenaexanaewa tsane painya coutha icha barapomonae ichi xua bequein jumexaeya paeba xua pinae pecui pawi jiwi. Matautano barapomonae paca itoroba xua matatsunpiwi wnae painya nejainchiwa tsane icha bapomonae ichi. ¹⁹Barapomonae jopa Cristo peyawa jinompaewichi, pon Wanacanamataxeinaein xuano xua pon asu jinompa naca exana. Matautano bapon caemonae naca cana exana bapontha wajume cowantsixae. Nacom naca cana exana xua beta wajume cocowantaponaewa, icha be pocotsi coyeneya xua pejume diwesitha paeba, icha poxonae jiwi ichi xua poxonae pia pexui wichatapona pexaewa peapatsixae.

²⁰Tsipei Cristo bayatha paca cayawa tupa. ¿Eta xua came awiya payabara nanta xeiname? Poxonae Cristo tupa bapon paca cana exana xua pana nacapanenebiyam abe painya neexanae cuiru coyenein weya. Matautano paca capanenebiya exana po peitorobi coyene weya xua jiwi exana pia nacapanenebiyaetsi. Poxonae baxua paca cana exana, Nacom tsitatsi xua bara be Cristo payawa werapame. Daichitha awiya paichichipame xua paexaname barapo peitorobi coyene, bequein barapo peitorobi coyenein jopa paca capanepaeyo abe painya neexanae cuiru coyenein weya. Apra saya jame Cristo paca capanepa, naetha petupaexae. ²¹Judiomonae ainya peitorobi coyenewan xeina xua pia peitorobi coyenewanxae pocotsiwa be iche: “Jopa jayabinde baxua. Jinya ebato opitha jopa panaeinde baxua. Jopa baxua necobetha pichinde”, jei.

²²Barapocotsi coyenein po coyenein xua jopa bewa pinae paexanaem tsane barapo coyenein, bapana jopa paca yawenae xua beta painya neexanaewa pocotsiwa Cristo paca itoroba. Barapocotsiwa jopa pajume naitaewatsinde, poxoru barapo pecuidubi coyenein apra pia peitorobi coyenein tatsi pomonae saya jiwi. Apra barapo peitorobi coyenewan

saya nainya weraweraca icha pexaewa ichi xua nainya weraweraca poxonaē jiwī xane. ²³Paxam pananta xeiname xua barapo peitorobi coyenewa xeina peantuyapusuwa poxoru be paca exana xua xanepanaya pajinompame, yawa be paca exana xua Nacom wunae pajaintame. Barapomonaē judiomonaē pia abe exaneibi pia coutha naperaxa exaneiba pia jūntemainaetsi xua abe exana. Ichitha awiya yabara nanta xeina pocotsiwa abe exana poxoru barapo peabewa ita cui dopitatsi xua baxua peexanaewa tsane. Barapomonaē saya ꞥ pepaēbeibi, ichitha cataunxuae jopa xanepanaya jinompaeyo.

3 ¹Tsipei Cristo bayatha paca cayawa asu, daxota panaitomare xua painya neexanaewa xua Cristo pocotsiwa ichichipa. Bapon Cristo eca Nacom pia nacuatheicha tatsi. Paxa pecoxa weya eca bapon. ²Saya panaitomtsiya nanta xeinare Jesucristo pia peitorobi coyenewan tatsi. Jopa payabara nanta xeinaēinde xua copei pexinaē coyenein pocotsiwa barapo cae pin nacuathe xeina. ³Tsipei bayatha paxam paca cayawa tupa Cristo, daxota jopa paexanaēinde pocotsiwa barapo cae pin nacuathe xeina. Painya neantujumopeyapusuwan jiwī jopa taeyo tsipei Nacom Cristo paca cayawa itacafetsiya xeina pia nacuatheicha. Mexeya poxoru Cristo peyawa poponaexae Nacom, daxota waxainchi poxonaē yawa jinompatsi Cristo barapara iruru yawa jinompatsi Nacom. Baxua jiwī jopa paca cui yaputaeyo. ⁴Bapon Cristo naca jumope antujumopeyapusu exana. Poxonaē Cristo equeicha patopaetsica paca cayawa baru naitutsina jiwitha pexeyina peitupanaē coichatha.

Meje yabara xua peru juntu coyene, xuano xua pena juntu coyene

⁵Po coyenein xua jiwī exana pia pepontha bara pana cui barapende. Painya xoba pana nasi cui matacaetame xua paweiweiname. Painya xoba paexaname po coyene abe po coyene ba aura exana poxonaē paexaname. Painya xoba pacui yabara nanta xeiname xua abe painya neexanaewa tsane. Painya xoba paichicha xecame xua ichamonaē xeina. Bu bichocono pacui yabara nanta xeiname beyacaincha xua poxonaē pacui yabara nanta xeiname Nacom. Baxua icha be poxonaē paichim poxonaē ibo nacom paantobem beyacaincha xua Nacom paantobem. ⁶Pomonaē xua barapocotsiwa exana, Nacom casebina barapomonaetha. Bexa tsane Nacom itawetsina xua jopa petapatsiwa tsainchi pia nacuatheicha, poxoru barapomonaē saya jumefeba nawita pocotsiwa Nacom itoroba. ⁷Icha barapomonaē ichi, xua abe exana, paxam bara paichim caena bayatha barapocotsiwa paexaname poxonaē jopa cataunxuae Jesucristo pajume cowuntsim. ⁸Ichitha anoxuae daxita pana cui barapende xua daxita peabe coyenein: xua peanaepanaē coyenewan, xua juniya pejei coyenewan, xua jopa xanepanaya peexanaē coyenein, xua saya abeya peyabara cueicueijejewa coyenewan, xua peyuyujejewa coyenewan.

⁹Jopa caemonae nantiya pana namuxitorobeibinde, anoxuae pena jũntũ coyenein painya nexainaexae tsipei peru jũntũ coyenein bayatha papentame. Tsipei barapo peru jũntũ coyenein jiwi ba ajumebeya cui itorobatsi xua abe exana. ¹⁰Tsipei anoxuae pena jũntũ coyenein paxeiname tsipei Nacom exana barapo pena jũntũ coyenein. Barapo pena jũntũ coyenein paca ita coxone exanapona Nacomtha. ¹¹Poxonae jiwi pena jũntũ coyenein xeina pejume cowũntsixae, bapoxonae Nacom tsita najũpatsi, metha bara bequein griegomonaepin tsipae, irũ metha bequein judiomonaepin tsipae, irũ metha bequein pon xua pewi thabinchi tsipae xua ichaxota pebiwi nareixacaena, irũ metha bequein pon jopa pewi thabinchi tsipae xua ichaxota pebiwi nareixacaena, irũ metha bequein pon penanapaincha poponaepin tsipae, irũ metha bequein pon unupin tsipae, irũ metha bequein pon pebusi cui taetaeinchi tsipae, irũ metha bequein pon pepu copatinchi tsipae xua bara piawa penata exanaewa tsane. Apará jame meisa bapon Cristo ainya cui peexanaeinchi. Mataũtano Cristo barũ popona pomonae peantobewixaetsi.

¹²Nacom paca itapeta xua piamonae tatsi pia paca necaexanaenexa pia paca necaantobexae. Daxota nantanuweya pacui yabara cananta xeinare ichamonae xua painya neyawenaewa tsane. Yawa betiya payawende ichamonae. Yawa jopa ichamonae patsita atsacande xua icha coyene painya neexanaenexa. Yawa jopa paeibinde ichamonae. Yawa jopa paaitaconae tsaibinde poxonae bequein ichamonae abe pacata exaneiba. ¹³Nantiya pana natsita xeinare po jũntũ coyene xua jopa painya neaitaconaewa xua poxonae bequein ichamonae abe pacata exana. Pacui yabara jũntemainare poxonae ichamonae pacata abe exana, icha Cristo ichi pon jiwi Pecanamataxeinaepin exanatsi xua daxita paca cui yabara jũntemaina xua abe paexaname. Bara paichinde pana nacui yabara jũntemainare daxita pocotsiwa abe pana nata exaname. ¹⁴Barapo coyenein paexande, yawa mataropeichiya paexandeno xua bichocono nantiya pana naantobeinde. Poxonae baxua paexanaename xua painya nenaantobewam, bapoxonae xaniwaicha paexaname pocotsiwa bayatha paca itorobatsi xua bewa paexanaem icha paxeiname pexanepanae cui ƒn্থn্থn. Ichitha poxoru painya nenaantobexae daxota bapo coyenein paexaname. ¹⁵Saya pacopare xua bara Cristo painya jũntũ coyeneintha pacata itorobina jũntema pia pepoponaewa tatsi xua daxota jũntema painya nejinompaewa tsane. Tsipei Nacom paca necajainchixae: “Caemonae painya nenaexanaewi pam”, paca necajainchixae. Paxeinare po coyene xua pajam tsaibi: “Nacom, maisa pajũntũ coyene weiweinan xua painta exaname”, xua po coyene pajam tsaibi.

¹⁶Po diwesi Cristo paca tsipaeba xua yawa paca itoroba, moya paexaneibare. Icha Cristo ichi xua paca cuiduba pejume diwesitha, barichi xuya ichamonae pacuidudubaponde. Mataũtano nantiya pana

nacui tsacarabare xua xanepanaya painya nejinompaewa tsane xua poxonae pajume taneme Cristo pejume diwesi. Nacom patanaxunare daxita weixi. Juntu coyene weiweinaya patsita naxunare Nacom. ¹⁷Pocotsiwa paichichipame xua painya nepaebiwa tsane, moya papaebare pocotsi pepaebiwa ichichipa Jesús. Yawano pocotsiwa paichichipame xua painya neexanaewa tsane, moya paexande xua pocotsi peexanaewa ichichipa Jesús pon jiwi Pecanamataxeinaeinxae. Bapontha pajande: “Jesús inta Axatha jande: ‘Maisa juntú coyene weiweinan xua bapon yawename’, inta, jande”, pajande Jesustha.

**Meje yabara xua pocotsiwa bewa exanae pomonae
Jesucristo pejume cowuntsiwi**

¹⁸Yabuxi pamxaem paca tsipaebatsi. Pajume taema. Painya seuriwi pajume jejan tsaibinde xua paca itorobeiba. Baxua paexaneibare tsipei pejume cowuntsi jiwi pam Jesús pon jiwi Pecanamataxeinaein. ¹⁹Pebiwi pamxaem paca tsipaebatsi. Pajume taema. Painya seuriwi paantobe tsaibinde. Baxua paexaneibare. Poxonae paitorobeibame, bichocono jopa pajan tsaibinde.

²⁰Pexui pamxaem paca tsipaebatsi. Painya axa jiwi xua iru painya ena jiwi beta pajume naitaewateibiya exaneibare pocotsiwa paca itorobeiba tsipei baxua Jesús pon jiwi Pecanamataxeinaein tsita ita cui xanepanatsi. ²¹Coxiyei jiwi pam, xua saya pebiwi jiwi pam paca tsipaebatsi. Painya xoba painya pexui pamuxutainyabame xua jopa beta exanaeyo. Icha baxua paexaname pexui jopa beta jinompaetsipae.

²²Pomonae amanaya pebusi cui taetaewichi pam, beta pajume naitaeware painya nepacacanamataxeinaewi, pomonae paca itoroba, pomonae xua po cae pin nacuathe jinompa. Jopa metha bepa meisa beta pajume naitaewatsipaem poxonae paca tane pomonae painya nepacacanamataxeinaewi. Apará jame beta painya nejume naitaewatsinexa poxonae pomonae painya nepacacanamataxeinaewi jopa imoxoyo paca taeyo. Jopa metha bepa meisa painya wunae taexanaetsi pomonae painya nepacacanamataxeinaewi. Apará jame painya wunae taexanaetsi iru Jesús pon jiwi Pecanamataxeinaein, tsipei paxam pomonae Jesucristo painya nejume cowuntsi jiwi pam. ²³Daxita i daxuan xua paexaname xanepanaya paexanare. Saya u pacananta xeinaeya exaneibare xua Cristo nexa, pon jiwi Pecanamataxeinaein. Jopa meisa saya pananta xeinaeya taexaneibinde xua pon painya nepacacanamataxeinaein, pon saya pepawi, xua saya jiton. ²⁴Bayatha payaputaneme xua bexa Cristo pon jiwi Pecanamataxeinaein paca catsibina xua paca juntana jeba pia nacuatheicha xua painya newetsixae pocotsiwa bapon paca itoroba. Paxam Cristo pia petanacuichi jiwichi pam pon yatsicaya jiwi pepa Pecanamataxeinaein. ²⁵Ichitha pon jopa

xanepanaya exanaeyo, bapon xeinaena pentoma xua jopa pexanepanae matoma. Nacom jiwi jopa natoxeincha necotsiyo. Pomonae pebusi cui taetaewichi, barapomonae Nacom nanta jupaya tane, icha pomonae pentacaponae wi ichi xua poxonae Nacom nanta jupaya tane. Daxota pon jopa xanepanaya exanaeyo, bapon xeinaena pentoma xua jopa pexanepanae matoma.

4 ¹Pomonae pentacaponae wi pam, xanepanaya pacana exande pomonae painya nebusi cui taetaeibi jiwi, tsipei paxam paxename painya pepa Nepacacanamataxeinaein itabocotha.

²Nacomtha cuitiya pana cui babatsiya wuca dubenanaebiyama. Poxonae Nacomtha pawqueibame, pajan tsaibinde: “Nacom, maisa pajuntũ coyene weiweinan xua pata tanecatsiwaxaem yawa xua painta exaname beta”, pajan tsaibinde. ³Yawano painta wucare Nacom xua Jesús pon jiwi Pecanamataxeinaein pata tana neyawenaewa tsane xua pata cueicueijeinexa bapon pejume diwesi tatsi daxita coyeneintha xua ichaxota pata ichipaewa xua pata paebeibiwa tsane. Barapo diwesi caena bayatha jiwi jopa yaputaeyo tsipei Nacom moya yawun xeina xua jiwi jopa yabara yaputaeyo. Ichitha anoxuae Nacom ichichipa xua jiwi yaputaena barapo diwesi. Barapo diwesi xua anoxuae apara xua Cristo naca yanaba. Jiwi pecubi botha neeta tana natsipei cueicueijeixae barapo diwesi. ⁴Painta wucare Nacom, xua xanepanaya tacaununaya cueicueijeinexa tsane Cristo pijume diwesi xua jiwi beta tana nejume taewa tsane pocotsiwa xua bewa cueicueijan tsane, pocotsiwa Nacom ichichipa.

⁵Dota pam, xanepanaya beta jume wunaeya pajinompare, tsipei paca tane pomonae jopa jume cowuntsiyo Jesucristo. Barapomonae patsipaebare xua pocotsiwa Nacom ichichipa xua poxonae po mataqueitha cataunxuae paca itacupa xua painya netsipaebiwa. ⁶Poxonae ichamonae patsipaebame, beta xanepanaya patsipaebare. Yawano bewa xanepanaya pajume notsim daxita jiwi.

Meje yabara poxonae Pablo najume weta po carte

⁷Daxita Tíquico neyabara diwesi paebina xua paca tsipaebina. Bapon be wayapin watsicotaein tsipei Jesucristo pejume cowuntsin. Bapon paantobein. Irũ bapon Tíquico Jesús pon jiwi Pecanamataxeinaein pia petanacuichin tatsi. Bapon Tíquico neyaweneiba xua Jesucristo pijume diwesi cueicueijeiji tsaibi. ⁸Daxota Tíquico painya xainya beya itoroban painya neyaputaenexa xua paxan xanepanaya bara juntepa pajinompan. Yawa bapon paca necacui tsacarabinexa xua juntepa painya nejinompaewa tsane. ⁹Tíquico bara beya pona irũ ichun napon, pon pewun Onésimo, pon be pata tayapin patsicotan pejume cowuntsixaerũ Jesucristo, yawano bapon paantobein. Barapon beta xanepanaya

pepoponaein Nacomtha. Tíquico irũno Onésimo, baponbe daxita yabara paca tsipaebina xua pocotsiwa xote exananje.

¹⁰Irũ Aristarco tajiton, pon jiwi pecũbi botha paecanbe, bapon paca jacoba. Irũ Marcos paca jacoba, pon Bernabé pamoyo tatsi. Tsipei bayatha payaputaneme xua Marcos pepatopaewa tsane. Paca itorobatsi bapon yabara. Icha patopaena bara beya, bapon pantenta weyataeya wabare.

¹¹Irũrũ Jesús paca jacoba, pon icha wũnno, Justo. Po acoibi poyobe, poyobe xuaunxuae paca jacoba meisa saya barapoyobe neyawena xote poyobe xua jiwana judiomonae, po judiomonae Jesucristo pejume cowũntsiwichi jiwanaabe. Barapo acoibi poyobe neyawenabe xua yabara cueicueijeibe Nacom Pejume Diwesi po diwesi xua Nacom waba jiwi xua petanaexanaenexatsi piamonae tatsi petajume cowũntsixaetsi Pexantotha. Barapoyobe nejũntũ cui tsacarababe xua jũntema tapoponaewa tsane.

¹²Irũrũ Epafras paca jacoba, pon painyamonae jiwana. Bapon Epafras Cristo Jesús pia petanacuichin tatsi. Bapon jume daunweya pacata wũqueiba Nacomtha, xua Nacom xanepanaya paca necaantũyarusũya daunweya exanaenexa tsane. Xaniwaicha painya neyaputaenexa pocotsiwa painya neexanaenexa, pocotsiwa Nacom ichichipa. ¹³Xan bara yatsicaewa tacui taewa xua Epafras pacata jume daunweya wũqueiba Nacomtha. Po coyene xua bapon baxua exana xaniwaicha, apara paxam nexa, irũ Laodicea tomaramonaepiwi nexa, irũ Hierápolis tomaramonaepiwi nexa. ¹⁴Irũrũ Lucas paca jacoba, pon jiwi peyawũbin, pon bichocono antobetsi xua jiwi antobe. Irũrũ Demas paca jacoba.

¹⁵Painta jacobare Jesucristo pejume cowũntsiwichi, pomonae Laodicea tomaratha ena. Irũ painta jacobare powa pewũn Ninfa. Irũrũ painta jacobareno pomonae pejume cowũntsiwi, pomonae nacaetuteiba Ninfa pia botha tatsi. ¹⁶Poxonae barapo carte payorobame equeicha ichũn pacare xua pecaponaenexa Laodicea tomara beya, xua xuya peyorobinexa barapo carte pomonaetha pomonae pejume cowũntsiwi poxonae nacaetuta. Yawa poxonae Laodicea tomaramonae pia carta tatsi papitame painya xainya berena barapo carta xuya payorobare painya penacaetutsi botha xua Colosas tomaratha. ¹⁷Paxam Arquipo pabarande: “Taema Arquipo, xaniwaicha baxua exande xua bayatha Jesucristo pon jiwi Pecanamataxeinaein pocotsiwa caitoroba xua wũnaeya xanepanaya nacui yabara jume wetsiname xua exaname”, pajande.

¹⁸Xan, Pablon, paca jacobatsi. Baxoyo tacobe couyeje, xoyo tinaxuban. Jopa pajũntemainaeinde xua jiwi pecũbi botha taecaewa. Nacomtha painta wũqueibare. Barabũ Nacom jũntema jinompa paca exana pia paca necaantobexae.

Baja Pablo.